

現代生活藝術系列

華嚴經疏論纂要

58

——十迴向品之十二——

華藏淨宗學會印贈

大方廣佛華嚴經疏論纂要卷第五十八

五臺山清涼國師澄觀疏鈔

太原方山長者李通玄 論

閩鼓山私淑比丘道需纂要

十迴向品第二十五

之十二

○第十等法界無量迴向於長行中。先位行。後位果。前中亦三。初牒名徵起。次依徵廣釋。後依釋結名。今初

佛子。云何爲菩薩摩訶薩等法界無量迴向

〔疏〕謂稱法界起大用故。然等者入義。故本分中名

入法界。法界無量。卽是所入。何法能入。畧有其四。
一。所迴行法。謂法施之行。稱法界施故。二。所行行
體。廣大無邊故。三。能迴之智。四。所向之德。謂以稱
法界之大智。迴等法界之善根。向同法界之大用。
成法界之行體。此則位滿至極。故標法界之名。當
法受稱。等何法界。此通四義。一。等理法界。故經云。
如法界一性。如法界自性清淨。善根迴向。亦復如
是。其文非一。二。等事法界。經云。欲見等法界無量
諸佛。調伏等法界無量衆生。或願起等法界無量
行。或願成等法界無量德。或願得等法界無量果。

皆卽理之事也。三等理事無礙法界。經云。願一切
衆生作修行無相道法師。以諸妙相而自莊嚴。則
相無相無礙。皆其類也。四等事事無礙法界。故經
云。一佛刹中。現一切佛刹等。然其四事全等。四種
法界。融而無二。故此能等。卽是所等。非有二物而
可依之。故上稱入。入無所入。本業但云法界。無等
入言。卽斯意也。彼釋云。覺一切法第一義諦中道
無相。一切法皆一相照故。第一中道。卽是所入。皆
一相照。卽是能入。此二無二。卽是法界。故不可但
以事法界爲名。鈔故不可下。結彈古人。言無量者。亦有二義。

一無分量卽理法界。二無數量卽事法界。前廻向明依體起用。此明體用無礙。圓極自在。卽以法施及諸相應。普賢自在。大善巧德爲其位體。

論第十等法界無量廻向。以智波羅密爲體。表法以善財童子所見安住地神。此是女神。表智悲成滿。可以說教利生。須當其智如神。其心如地。載育萬物。不以爲勞。如地能生。能養。能載。終始不移焉。

○第二依徵廣釋。文分爲三。初明所廻善根。二以此善根下。攝將廻向。三佛子菩薩摩訶薩如是廻向時安住下。廻向成德初中。二先明行依身。

位。第二依位起行。今初。

佛子。此菩薩摩訶薩。以離垢繒而繫其頂。住法師位。

〔疏〕如第十地。得離垢三昧。受智職位。內得此定。灌心首故。外示表彰。白繒繫頂。法從喻稱。名離垢繒。但有此相。知得彼定。表位成滿。方能雲雨說法。以益羣生。名法師位。然斯位滿。總有五重。一約信滿。如賢首品說。便得灌頂而升位等。二約解滿。如灌頂住及海幢處說。三約行滿。如第十行入因陀羅網法界等。四善巧願滿。如此位辨。五約證滿。如十地說。此五重內。隨一成處。必具理行。內相應故。皆

名位滿。然信解等殊。故不相濫。若約圓融。但一位滿。卽因究竟。更不待餘。又若得一。卽得餘位。總一法界受職之位。隨門差別。五位不同。法體融通。全攝無礙。不同餘教。

○二依位起行中。二先明起行。後顯其行成。又前卽利他。後明自利。又前明自分。後顯勝進。今初起行。

廣行法施。起大慈悲。安立衆生於菩提心。常行饒益。無有休息。以菩提心長養善根。爲諸衆生作調御師。示諸衆生一切智道。爲諸衆生作法藏日。善根光明。

普照一切。於諸衆生。其心平等。修諸善行。無有休息。心淨無染。智慧自在。不捨一切善根道業。作諸衆生大智商主。普令得入安隱正道。爲諸衆生而作導首。令修一切善根法行。爲諸衆生作不可壞堅固善友。令其善根增長成就。

疏十一句。初總餘別。別謂慈等。皆是法施。夫法施者。生解之妙方。起行之根本。入聖道之階漸。越苦海之津梁。古德云。此經中託人以弘道。多歎法師之勝德。寄行以表法。每引普賢爲末篇。故知法施之功。過財施之難喻。於中十句。一慈悲安物於菩

提心。二益物無息。上二卽廣大心。三大心長善。揀
非餘爲。四究竟調御。御以佛道。上二卽第一心。五
法日普照。六等勸修善。晉經云。欲使衆生修諸善
根。上二卽常心。常愛衆生同於已故。名爲平等。七
心淨無礙。卽不顛倒心。顛倒有二。一心染能所之
化。今不生於化。其化大焉。名智自在。二見無能所
便趣寂滅。今不捨善業。無滯事理。八示果寶渚。故
云商王安隱正道。俱通因果。果卽涅槃菩提。因卽
八正萬行。九導以萬行之因。上二卽作義利。亦第
一心也。十增長不壞。爲護念也。初令發心。終令成

就。有始有卒。其唯聖人。然廣等四心。般若雖當發心住中。位位皆用。初明所廻善根竟。

○第二行成

佛子。此菩薩摩訶薩。以法施爲首。發生一切清淨白法。攝受趣向一切智心。殊勝願力究竟堅固。成就增益具大威德。依善知識心無諂誑。思惟觀察一切智門無邊境界。

〔疏〕行成中二。初牒前。晉經云。菩薩行法施等一切善法。後攝受下。正顯成相。文顯可知。

○第二攝將廻向。文小異前諸段。通下總有二十

一門。若通將上十句法施善根。共成諸段。理無間然。今且分三。初九門。別對十一句善根。以明迴向。卽自分迴向。次四門。通顯迴向之意。三有八門。更以異門。別明迴向。卽勝進迴向。今初卽爲九段。第一願聞法見佛修二利行。對前二句。於中二。初一願總明。餘皆別顯。今初

以此善根如是迴向。願得修習成就。增長廣大無礙一切境界。

〔疏〕初句牒前起後願得已下。正顯願辭。一切境者。文局初段。義總該於二十一段迴向。皆一切境。此

一切境廣大如法界。理事事事。皆無障礙。如此之境。皆得增長成就。

○後別顯中二。初願聞法受持

願得於佛正教之中。乃至聽聞一句一偈。受持演說。
〔疏〕願聞法受持。卽成上文廣行法施之義。

○二願念佛修行。成上饒益無休。於中亦二。初正
明念佛之行。

願得憶念與法界等。無量無邊一切世界去來現在
一切諸佛。旣憶念已。修菩薩行。

○次迴念佛善。成二利行。於中亦二。先總爲一切

徧於時處修菩薩行

又願以此念佛善根爲一衆生於一世界。盡未來劫修菩薩行。如於一世界。盡法界虚空界一切世界。皆亦如是。如爲一衆生。爲一切衆生。亦復如是。以善方便。一一皆爲盡未來劫大誓莊嚴。終無離佛善知識。常見諸佛現在其前。無有一佛出與於世不得親近。

○後別明修行。梵行爲萬行之本。故偏明之。於中
三。初總舉所願。

一切諸佛及諸菩薩所讚所說清淨梵行。誓願修行。

悉令圓滿

○二列所修之行

所謂不破梵行。不缺梵行。不雜梵行。無玷梵行。無失
梵行。無能蔽梵行。佛所讚梵行。無所依梵行。無所得
梵行。增益菩薩清淨梵行。三世諸佛所行梵行。無礙
梵行。無著梵行。無諍梵行。無滅梵行。安住梵行。無比
梵行。無動梵行。無亂梵行。無恚梵行。

疏二中有二十梵行。與智論所列十戒多同。所謂
不缺。不破。不穿。不雜。隨道。無著。智所讚。自在。隨定。
具足。通用性戒而爲根本。今開爲二十。一不破在

初者。謂持四重十重。若犯此者。猶破器無用。故二不缺者。謂持僧殘。殘如器缺。猶可修補。三持方便。若念破戒事。染心共語。聞環釧聲。皆名爲雜。四持波逸提。如白圭之玷。雖則可磨。亦不爲也。五定心相應。乃至吉羅。亦不誤失。六緣不能壞。上三皆不穿戒。穿如漏器。不堪受道。前六皆律儀。七卽智所讚。謂事理無違。契聖心故。八不依名利果報。九不得能持所持。由有此二。雖秉御自他。於世間中。得自在也。次三皆隨道戒。十揀小道。十一顯是佛行。十二兼能通達非道。故云無礙。皆隨中道也。十三

無著。卽見真成聖。次四卽具足戒。謂觀中道。具事
理故。一事理無違。二順理而行。則常不滅。三心能
詣理。四對餘超勝。無動已下。皆隨定戒。謂隨首楞
嚴定。不起滅定現諸威儀。雖示十法界像。無戒不
行。而寂然不動。順境不能亂。違境而無恚。又安住
無比。卽住大慈悲。無動無亂。卽捨心常現。無恚卽
喜。是四等心。亦名梵行。

○第三通難釋成者。有伏難云。菩薩期心。先人後
已。今先自行。豈不相違。故下釋云。但自修行。便
能益物。此亦成上安立衆生於菩提心。及以菩

提心長養善根。文中分二。初正明。二重徵釋。今初。

佛子。菩薩摩訶薩。若能爲已修行如是清淨梵行。則能普爲一切衆生。令一切衆生皆得安住。令一切衆生皆得開曉。令一切衆生皆得成就。令一切衆生皆得清淨。令一切衆生皆得無垢。令一切衆生皆得照明。令一切衆生離諸塵染。令一切衆生無諸障翳。令一切衆生離諸熱惱。令一切衆生離諸纏縛。令一切衆生永離諸惡。令一切衆生無諸惱害。畢竟清淨。

疏先總明。後令一切下。別顯。有十一句。總顯持犯。

前六明有持德。一安住者。通任諸戒。二開曉者。明
閑持犯。三善行。四惡止。五心無垢。六智能照。後六
明無犯過。一不起心過。故無塵染。二不犯身口。故
無業報障。照明開曉。不翳於理。三由不犯則。二世
清涼。四離無慚及悔纏所縛。五離惡因惡果。六不
自惱惱他。成波羅密。

○二重徵釋中。二初正徵反釋。後重徵順釋。今初。
何以故。菩薩摩訶薩。自於梵行。不能清淨。不能令他
而得清淨。自於梵行。而有退轉。不能令他無有退轉。
自於梵行。而有失壞。不能令他無有失壞。自於梵行。

而有遠離。不能令他常不遠離。自於梵行而有懈怠。不能令他生懈怠。自於梵行不生信解。不能令他心生信解。自於梵行而不安住。不能令他而得安住。自於梵行而不證入。不能令他心得證入。自於梵行而有放捨。不能令他恒不放捨。自於梵行而有散動。不能令他心不散動。

〔疏〕徵意云。自他行異。如何自行。便是爲他。釋意云。自身不正。其令不從。故上自行。便爲爲物。淨名云。若自有縛。能解彼縛。無有是處。攝論云。若自任邪行。設欲正他非。是人終不能制止他過失。文有十

句。例上可知。鈔攝論云等。卽梁論第七。引契經說。若無性攝論當第五。句小異云。如契經言。若自任邪行。便受他譏謗。是人終不能制止。他過失。又云。若懷瞋忿。誨他所犯。以非利益。非方便。故言不威肅。他轉違背。起諸邪行。如有頌云。慈憐如一子。誨舉他所犯。決定令受持。後不復當犯。

○二重徵順釋

何以故。菩薩摩訶薩。住無倒行。說無倒法。所言誠實。如說修行。淨身口意。離諸雜染。住無礙行。滅一切障。菩薩摩訶薩。自得淨心。爲他演說清淨心法。自修和忍。以諸善根調伏其心。令他和忍。以諸善根調伏其心。自離疑悔。亦令他人永離疑悔。自得淨信。亦令他得不壞淨信。自住正法。亦令衆生安住正法。

疏意云。石雖不利。而能利刀。自雖不行。何妨化物。今云不能益者。其故何耶。釋意云。若自犯教他。便成顛倒。菩薩無倒。必言行相符。故要如說而行。方能如行而說。文中先總明。後菩薩下。別顯。初門竟。

○第二復次。願得法廣演。以益自他。亦成上文爲調御師。示一切智道。文分爲二。初牒前起後。次正明。三總結。今初。

佛子。菩薩摩訶薩。復以法施。所生善根。如是迴向。

○二正明

所謂願我獲得一切諸佛無盡法門。普爲衆生分別。

解說皆令歡喜心得滿足。摧滅一切外道異論。願我能爲一切衆生演說三世諸佛法海。於一一法。生起一一法義理。一一法名言。一一法安立。一一法解說。一一法顯示。一一法門戶。一一法悟入。一一法觀察。一一法分位。悉得無邊無盡法藏。獲無所畏具四辯才。廣爲衆生分別解說。窮未來際而無有盡。爲欲令一切衆生立勝志願。出生無礙無謬失辯。爲欲令一切衆生皆生歡喜。爲欲令一切衆生成就一切淨法光明。隨其類音演說無斷。爲欲令一切衆生深信歡喜住一切智。辯了諸法俾無迷惑。作是念言。我當普

於一切世界爲諸衆生精勤修習。得徧法界無量自在身。得徧法界無量廣大心。具等法界無量清淨音聲。現等法界無量衆會道場。修等法界無量菩薩業。得等法界無量菩薩住。證等法界無量菩薩平等。學等法界無量菩薩法。住等法界無量菩薩行。入等法界無量菩薩迴向。

〔疏〕二中二願。初一願總明得法。文有四節。一得法。二解說。三益機。四摧滅下。成自德。二願我下一願。別明演法。釋前四段。故晉經異論之下。無願我之言。文分爲五。初總明。二於一一下。明得法。三獲無

所畏下。能演。四爲欲令下。明所爲機。竝可知。五作是念言下。自修成德。卽爲物勤修。自成已德。成十種德。初二云徧。徧於事理。餘八云等。兼等無礙。影畧其文。其中云任者。卽聖天梵等。

○第三總結

是爲菩薩摩訶薩。以諸善根而爲迴向。爲令衆生悉得成就一切智故。

〔疏〕結中。上成自德。亦爲攝生。故復重云。爲令衆生成一切智。

○第三復次。願得二利。行圓成。上作法藏日獲智。

見佛等。皆普照故。

佛子。菩薩摩訶薩。復以善根如是迴向。所謂爲欲見等法界無量諸佛。調伏等法界無量衆生。住持等法界無量佛刹。證等法界無量菩薩智。獲等法界無量無所畏。成等法界無量諸菩薩陀羅尼。得等法界無量諸菩薩不思議住。具等法界無量功德。滿等法界無量利益衆生善根。又願以此善根故。令我得福德平等。智慧平等。力平等。無畏平等。清淨平等。自在平等。正覺平等。說法平等。義平等。決定平等。一切神通平等。如是等法皆悉圓滿。如我所得。願一切衆生亦

如是得。如我無異。

〔疏〕文中二。先通明二利。後又願下。別明二利。卽成上文。於諸衆生。其心平等。初以自等於理。後如我所得下。令物等自。

○第四復次願行稱法界

佛子。菩薩摩訶薩。復以善根如是迴向。所謂如法界無量。善根迴向亦復如是。所得智慧終無有量。如法界無邊。善根迴向亦復如是。見一切佛無有其邊。如法界無限。善根迴向亦復如是。詣諸佛刹無有齊限。如法界無際。善根迴向亦復如是。於一切世界修善。

薩行無有涯際。如法界無斷。善根迴向亦復如是。住一切智永不斷絕。如法界一性。善根迴向亦復如是。與一切衆生同一智性。如法界自性清淨。善根迴向亦復如是。令一切衆生究竟清淨。如法界隨順。善根迴向亦復如是。令一切衆生悉皆隨順。普賢行願。如法界莊嚴。善根迴向亦復如是。令一切衆生以普賢行而爲莊嚴。如法界不可失壞。善根迴向亦復如是。令諸菩薩永不失壞。諸清淨行。

疏行稱法界。成上心淨無染。及智慧自在。以動合法界。故無所染。是以末云。永不失壞。諸清淨行。此

章多同理法界也。如智因理發。故同法界。餘皆準之。卽向實際意也。

○第五復次有十四願。願得見佛解法。

佛子。菩薩摩訶薩。復以此善根如是迴向。所謂願以此善根承事一切諸佛菩薩。皆令歡喜。願以此善根速得趣入一切智性。願以此善根徧一切處修一切智。願以此善根。令一切衆生常得往觀一切諸佛。願以此善根。令一切衆生常見諸佛能作佛事。願以此善根。令一切衆生恒得見佛。不於佛事生怠慢心。願以此善根。令一切衆生常得見佛。心喜清淨無有退。

轉願以此善根。令一切衆生常得見佛心善解了。願以此善根。令一切衆生常得見佛不生執著。願以此善根。令一切衆生常得見佛了達無礙。願以此善根。令一切衆生常得見佛成普賢行。願以此善根。令一切衆生常見諸佛現在其前無時暫捨。願以此善根。令一切衆生常見諸佛出生菩薩無量諸力。願以此善根。令一切衆生常見諸佛。於一切法永不怠失。

疏見佛解法。成上大智商王初二自成智性。是商王德餘爲衆生。是商王事。

○第六復次願解法界

佛子。菩薩摩訶薩。又以諸善根如是迴向。所謂如法界無起性迴向。如法界根本性迴向。如法界自體性迴向。如法界無依性迴向。如法界無忘失性迴向。如法界空無性迴向。如法界寂靜性迴向。如法界無處所性迴向。如法界無遷動性迴向。如法界無差別性迴向。

〔疏〕願解法界。卽理法界。豈以此文而名隨相。然此中云如。晉經云解。解契於理。故名爲如。卽是成前安隱正道。文有十句。一不隨緣變。二不守自性。故爲法本。三如亦復如。是其自體。故晉經中。名爲如。

如。四非是能依。五不麤離如。六隨緣無性。卽是如性。七無性亦無。本來寂靜。八無二性。離能所故。九不隨三世。十一味平等。

○第七復次願衆生成法師

佛子。菩薩摩訶薩。復以法施。所有宣示。所有開悟。及因此起一切善根。如是迴向。所謂願一切衆生成菩薩法師。常爲諸佛之所護念。願一切衆生作無上法師。方便安立一切衆生於一切智。願一切衆生作無屈法師。一切問難莫能窮盡。願一切衆生作無礙法師。得一切法無礙光明。願一切衆生作智藏法師。能

善巧說一切佛法。願一切衆生成諸如來自在法師。
善能分別如來智慧。願一切衆生作如眼法師。說如
實法不由他教。願一切衆生作憶持一切佛法法師。
如理演說不違句義。願一切衆生作修行無相道法
師。以諸妙相而自莊嚴。放無量光善入諸法。願一切
衆生作大身法師。其身普徧一切國土。興大法雲。雨
諸佛法。願一切衆生作護法藏法師。建無勝幢護諸
佛法。令正法海無所缺減。願一切衆生作一切法日
法師。得佛辯才巧說諸法。願一切衆生作妙音方便
法師。善說無邊法界之藏。願一切衆生作到法彼岸

法師。以智神通開正法藏。願一切衆生作安住正法
法師。演說如來究竟智慧。願一切衆生作了達諸法
法師。能說無量無盡功德。願一切衆生作不誑世間
法師。能以方便令入實際。願一切衆生作破諸魔衆
法師。善能覺知一切魔業。願一切衆生作諸佛所攝
受法師。離我我所攝受之心。願一切衆生作安隱一
切世間法師。成就菩薩說法願力

〔疏〕願衆生成法師。卽成上而作導首。導首卽是法
師。上爲他作。今令他作。仁王經說十三法師。如來
滅後。流化不絕。亦名法師。如法華。菩薩藏經。各有

其品。今此多就極勝而說。於中有二十法師。七云如眼者。現證。非聞見故。九無相之相。是妙相故。二十唯有說法。能安世間。

○第八復次不取著迴向。卽向實際。

佛子。菩薩摩訶薩。復以諸善根如是迴向。所謂不以取著業故迴向。不以取著報故迴向。不以取著心故迴向。不以取著法故迴向。不以取著事故迴向。不以取著因故迴向。不以取著語言音聲故迴向。不以取著名句文身故迴向。不以取著迴向故迴向。不以取著利益衆生故迴向。

疏此及第九。成上作不可壞堅固善友。此之一段。
明堅固緣。文顯可知。

○第九離過成德迴向。先十七句離過。卽離可壞
緣。後但爲下成德。明其所爲。爲不可壞堅固善
友。今初。

佛子。菩薩摩訶薩。復以善根如是迴向。所謂不爲耽
著色境界故迴向。不爲耽著聲香味觸法境界故迴
向。不爲求生天故迴向。不爲求欲樂故迴向。不爲著
欲境界故迴向。不爲求眷屬故迴向。不爲求自在故
迴向。不爲求生死樂故迴向。不爲著生死故迴向。不

爲樂諸有故迴向。不爲求和合樂故迴向。不爲求可樂著處故迴向。不爲懷毒害心故迴向。不壞善根故迴向。不依三界故迴向。不著諸禪解脫三昧故迴向。不住聲聞辟支佛乘故迴向。

疏前十五事護煩惱行於中初二。不耽現境。次一不求當報。餘通二世。後一護小乘行。其第十六。若解脫三昧。唯小乘因。諸禪三昧。通生處因。未得不求。已得不著。誰復求處。所謂求生。生必成故。求和合者。除涅槃樂。皆有合故。沙彌求龍。是懷毒迴向。願爲魔王。卽壞善迴向。鈔沙彌求龍者。智論云。昔有羅漢。居近龍池。每至食

時皆請羅漢入池供養。羅漢神通安坐繩床。忽然而去。有一沙彌於一日中。臨至食時。密在床下。攀繩床轆。羅漢不知。如常運通。至龍池中。從床下出。龍王怪問。此未離欲。何以將來。以天甘露。以供養羅漢。以人間味。而饒沙彌。沙彌滌鉢。駭其香味。恨師忿龍。兼貪龍女。與心欲奪。龍得他心。知沙彌意。復兼頭痛。求其謝過。沙彌心志毒願。不息。加切。精誠復足。下水出。尋至池邊。以衣覆頭。便化為龍。遂入池內。咬殺其龍。奪其宮殿。妻子眷屬。報龍已罪。卽興風雲。震雷降雹。拔倒寺宇。淨無所有。國王知之。復爲立寺。復被毀滅。國王大怒。遂要其龍。若更爲害。當填此池。龍遂謝過。謂其師曰。自今已後。不敢爲惡。然是龍身。性多瞋毒。恐後還發。若見池上。有黑雲生。卽是弟子起於惡心。當令鳴鐘念摩訶。般若。惡心則息。後如其言。每有雲起。卽念般若。鳴鐘擊磬。雲則散滅。釋曰。此沙彌爲龍。具有二意。一爲貪色味。二爲瞋恚。而皆是毒。

○後顯成德

但爲教化調伏一切衆生故迴向。但爲成滿一切智
智故迴向。但爲得無礙智故迴向。但爲得無障礙清
淨善根故迴向。但爲令一切衆生超出生死證大智
慧故迴向。但爲令大菩提心如金剛不可壞故迴向。
但爲成就究竟不死法故迴向。但爲以無量莊嚴莊
嚴佛種性示現一切智自在故迴向。但爲求菩薩一
切法明大神通智故迴向。但爲於盡法界虛空界一
切佛刹行普賢行圓滿不退被堅固大願鎧。令一切
衆生住普賢地故迴向。但爲盡未來劫度脫衆生常
無休息。示現一切智地無礙光明恒不斷故迴向。

疏亦是所求。在文易了。

○大文第二四門。總顯迴向之意。故初不云復以善根。但云以彼善根迴向時。居然揀別。四門卽爲四別。初一門。明應向實際。及向衆生。第二門。明應向菩提。第三門。明應離過。第四門。明有成益。初門爲二。初明應向實際。後又爲令下。明應向衆生。今初。

佛子。菩薩摩訶薩。以彼善根迴向時。以如是心迴向。所謂以本性平等心迴向。以法性平等心迴向。以一切衆生無量平等心迴向。以無諍平等心迴向。以自

性無所起平等心迴向。以知諸法無亂心迴向。以入三世平等心迴向。以出生三世諸佛種性心迴向。以得不退失神通心迴向。以生成一切智行心迴向。

〔疏〕本性。卽不變性。法性。卽隨緣性。衆生是人。卽無分量。無諍是法。理事不乖。自性。則起無所起。諸法。則橫該本寂。三世。則豎入無差。以知法性爲緣。則生起佛種。依性依用。無退失時。照斯實際。實智行立。

○後應向衆生

又爲令一切衆生永離一切地獄故迴向。爲令一切

衆生不入畜生趣故迴向。爲令一切衆生不往閻羅
王處故迴向。爲令一切衆生除滅一切障道法故迴
向。爲令一切衆生滿足一切善根故迴向。爲令一切
衆生能應時轉法輪令一切歡喜故迴向。爲令一切
衆生入十力輪故迴向。爲令一切衆生滿足菩薩無
邊清淨法願故迴向。爲令一切衆生隨順一切善知
識教。菩提心器得滿足故迴向。爲令一切衆生受持
修行甚深佛法得一切佛智光明故迴向。爲令一切
衆生修諸菩薩無障礙行常現前故迴向。爲令一切
衆生常見諸佛現其前故迴向。爲令一切衆生清淨

法光明常現前故迴向。爲令一切衆生無畏大菩提
心常現前故迴向。爲令一切衆生菩薩不思議智常
現前故迴向。爲令一切衆生普救護衆生令清淨。大
悲心常現前故迴向。爲令一切衆生以不可說不可
說勝妙莊嚴具莊嚴。一切諸佛刹故迴向。爲令一切
衆生摧滅一切衆魔鬪諍羅網業故迴向。爲令一切
衆生於一切佛刹皆無所依修菩薩行故迴向。爲令
一切衆生發一切種智心。入一切佛法廣大門故迴
向。

〔疏〕向衆生中。有二十所爲。七云十力輪者。圓滿摧

伏故十四云無畏菩提心者。不畏生處長遠。衆生
 難度。轉依難證。萬行難修。菩提曠遠故。鈔不畏等
 練磨心。唯識第九資糧位中偈云。乃至未起識。求
 任唯識性。於二取隨眠。猶未能伏滅。長行釋未能
 伏滅中云。此位二障雖未能滅。修勝行時。有三退
 屈。而能三事練磨其心。於所證修。勇猛不退。一聞
 無上正等菩提廣大深遠。心便退屈。引他已證大
 菩提者。練磨自心。勇猛不退。注云。第一菩提廣大
 屈。引他况已練。廣者無邊。大者無上。深者難測。遠
 者長時。由此退屈。引他已證。我同彼類。何故退耶。
 攝論頌云。十方世界諸有情。念念速成善逝果。彼
 既丈夫我亦爾。不應自輕而退屈。二聞施等波羅
 密多甚難可修。心便退屈。省已意樂。能修施等。練
 磨自心。勇猛不退。注云。第二萬行難修。屈省已增
 修練。偈云。汝已惡道經多劫。無益受苦尚能超。今
 修少善得菩提。大利不應生退屈。三聞諸佛圓滿
 轉依。極難可證。心便退屈。引他粗善况已。妙因練
 磨其心。勇猛不退。卽第二轉依難證。屈引粗况。妙

練。如行施等。尚感貴樂。况我所修清淨妙善而無果耶。論偈云。博地凡夫初發心。尚擬遠趣菩提果。我已精進經多劫。不應退屈卻沉淪。論云。由斯三事。練磨其心。堅固熾然。修諸勝行。今疏初不畏生。欣長遠。衆生難度。卽通說也。轉依難證下。卽例牒。三種練磨之心。故總說云。不畏無性攝論。當其第六。

○第二應向菩提

佛子。菩薩摩訶薩。又以此善根正念清淨迴向。智慧決定迴向。盡知一切佛法方便迴向。爲成就無量無礙智故迴向。爲欲滿足清淨殊勝心故迴向。爲一切衆生住大慈故迴向。爲一切衆生住大悲故迴向。爲一切衆生住大喜故迴向。爲一切衆生住大捨故迴

向。爲永離二著住勝善根故迴向。爲思惟觀察分別
演說一切緣起法故迴向。爲立大勇猛幢心故迴向。
爲立無能勝幢藏故迴向。爲破諸魔衆故迴向。爲得
一切法清淨無礙心故迴向。爲修一切菩薩行不退
轉故迴向。爲得樂求第一勝法心故迴向。爲得樂求
諸功德法自在清淨一切智智心故迴向。爲滿一切
願。除一切諍。得佛自在無礙清淨法。爲一切衆生轉
不退法輪故迴向。爲得如來最上殊勝法。智慧日百
千光明之所莊嚴。普照一切法界衆生故迴向。爲欲
調伏一切衆生隨其所樂常令滿足。不捨本願盡未

來際聽聞正法修習大行。得淨智慧離垢光明。斷除一切憍慢。消滅一切煩惱。裂愛欲網。破愚癡闇。具足無垢無障礙法。故迴向爲一切衆生於阿僧祇劫常勤修習一切智行。無有退轉。一一令得無礙妙慧。示現諸佛自在神通。無有休息。故迴向。

〔疏〕向菩提者。有二十二迴向。前三無爲字。欲成二十故。於中前二十迴向。明因圓果滿。後二明得果不捨因。窮未來際以化物。

○第三明應離過。及第四成益。

佛子。菩薩摩訶薩。以諸善根如是迴向時。不應貪著。

三有五欲境界。何以故。菩薩摩訶薩。應以無貪善根
迴向。應以無瞋善根迴向。應以無癡善根迴向。應以
不害善根迴向。應以離慢善根迴向。應以不諂善根
迴向。應以質直善根迴向。應以精勤善根迴向。應以
修習善根迴向。佛子。菩薩摩訶薩。如是迴向時。得淨
信心。於菩薩。行歡喜。忍受。修習清淨。大菩薩道。具佛
種性。得佛智慧。捨一切惡。離眾魔業。親近善友。成已
大願。請諸眾。生設大施會。

疏文並易知

○大文第三。有八門。更以異門。別明迴向。卽是勝

進。文分四別。第一二門。迴向衆生。二有三門。迴
向菩提。三有二門。總顯所爲。四有一門。迴向實
際。今初分二。前門願得圓音。後門總令具德。今
初

佛子。菩薩摩訶薩。復以此法施所生善根。如是迴向。
所謂令一切衆生得淨妙音。得柔軟音。得天鼓音。得
無量無數不思議音。得可愛樂音。得清淨音。得周徧
一切佛刹音。得百千那由他不可說功德莊嚴音。得
高遠音。得廣大音。得滅一切散亂音。得充滿法界音。
得攝取一切衆生語言音。得一切衆生無邊音聲智。

得一切清淨語言音聲智。得無量語言音聲智。得最自在音入一切音聲智。得一切清淨莊嚴音。得一切世間無厭足音。得究竟不繫屬一切世間音。得歡喜音。得佛清淨語言音。得說一切佛法遠離癡翳名稱普聞音。得令一切衆生得一切法陀羅尼莊嚴音。得說一切無量種法音。得普至法界無量衆會道場音。得普攝持不可思議法金剛句音。得開示一切法音。得能說不可說字句差別智藏音。得演說一切法無所著不斷音。得一切法光明照曜音。得能令一切世間清淨究竟至於一切智音。得普攝一切法句義音。

得神力護持自在無礙音。得到一切世間彼岸智音。
又以此善根。令一切衆生得不下劣音。得無怖畏音。
得無染著音。得一切衆會道場歡喜音。得隨順美妙
音。得善說一切佛法音。得斷一切衆生疑念皆令覺
悟音。得具足辯才音。得普覺悟一切衆生長夜睡眠
音。

疏以法師位故。欲令物同得圓音。演法要故。有四
十五種音聲。卽密迹經中六十種音。但數不足。次
多不同。名或小異。鈔密迹經。卽大寶積經中。金剛
力士會第三之三。卷當第十。爾
時寂意菩薩復問。金剛力士。如來有幾事秘要。答
有三種。一曰身密。二曰意密。三曰口密。口中說六

十種音。廣讚如來無思無想無言之言竟。卽云。又如來從口敷演。如一言詞。出六十品各異音聲。又此所明。顯德廣大。如彼但云。普入衆會音。此則云。普至法界無量衆會道場等。法有所本。不可不知。名言不同。無俟全會。中間云音聲智者。在心爲智。宣吐稱音。皆應具二。影畧而說。第八云不可說功德莊嚴者。大悲芬陀利經說。以三千界衆生功德爲一聚。更增十倍。不及如來一毛功德。展轉乃至無見頂前一切功德總爲一聚。更增百千萬億那由他阿僧祇倍。不及如來胸中大種所發音聲一聲功德。彼約總說。卽此別明。然六十種中。不出有

離衆過惡清淨一切智心。願一切衆生得離衆過惡
無量清淨菩提心。願一切衆生得離衆過惡了知諸
根清淨方便。願一切衆生得離衆過惡清淨信解。願
一切衆生得離衆過惡清淨勤修無礙行。願一切
衆生得離衆過惡清淨正念智慧辯才。

〔疏〕具德中十句。前五果滿。後五因圓。

○第二三門。迴向菩提。分三。初一門得正果。次一
二果因圓。後一依報果滿。今初。

佛子。菩薩摩訶薩。復以諸善根爲一切衆生如是迴
向。願得種種清淨妙身。所謂光明身。離濁身。無染身。

清淨身。極清淨身。離塵身。極離塵身。離垢身。可愛樂身。無障礙身。於一切世界現諸業像。於一切世間現言說像。於一切宮殿現安立像。如淨明鏡種種色像。自然顯現。示諸衆生大菩提行。示諸衆生甚深妙法。示諸衆生種種功德。示諸衆生修行之道。示諸衆生成就之行。示諸衆生菩薩行願。示諸衆生於一世界一切世界佛興於世。示諸衆生一切諸佛神通變化。示諸衆生一切菩薩不可思議解脫威力。示諸衆生成滿普賢菩薩行願一切智性。菩薩摩訶薩以如是等微妙淨身。方便攝取一切衆生。悉令成就清淨功

德一切智身

〔疏〕然上衆生得果。有其十句。各應有多。今但廣初
一身。則餘可例取。文中三。初明得身。次顯身用。後
結所成。前中初總相。所謂下別相。身是同相。餘是
異相。成壞可知。然此十身。通法通智。一光明者。身
光智光。無不照故。二體無闇障。能鑒徹故。三體不
受染。若彼潤玉。涅而不緇。四淨德內充。如玉無瑕
翳。五非麤特淨。揀異下流。上三就體辨。次三對境
以明。六不爲塵空。對上清淨。七極微不著。對極清
淨。八垢穢無汗。對上不染。若就內德。卽煩惱障盡。

名爲離塵。習氣亦亡。名極離塵所知不任。名離心垢。九具柑具德。十形充法界。智徧十方。山河事理不能障礙。鈔若彼等者。涅者。水中黑泥。縑者。一於黑色。謂若玉在泥中。千載不黑。一切下。依身起用。前四色身用。前三羅一身於法界。後一收萬像於一身。次示諸下五句。智身用。後示菩薩行願下。通二身用。後菩薩下。總結所成。

○第二門。願二果因圓中二。初卽理起用行。

佛子。菩薩摩訶薩。復以法施所生善根。如是迴向。願身隨住一切世界。修菩薩行。衆生見者皆悉不虛。發菩提心。永無退轉。順真實義。不可傾動。於一切世界。

盡未來劫住菩薩道而無疲厭。大悲均普量同法界。知衆生根。應時說法常不休息。於善知識心常正念。乃至不捨一剎那頃。一切諸佛常現在前。心常正念。未曾暫懈。修諸善根無有虛僞。置諸衆生於一切智。令不退轉。具足一切佛法光明。持大法雲。受大法雨。修菩薩行。

〔疏〕初成行緣。身隨住故。次衆生見下。利他不空。後於善知識下。兼通二利。

○後卽事入玄

入一切衆生。入一切佛刹。入一切諸法。入一切三世。

入一切衆生業報智。入一切菩薩善巧方便智。入一切菩薩出生智。入一切菩薩清淨境界智。入一切佛自在神通。入一切無邊法界。於此安住修菩薩行。

建東大雲菴比丘通棧捐貲刊刻
華嚴經十廻向品疏論纂要第五十八
卷永遠流通上薦
師祖照鑲神遊淨域業卸塵勞蓮開上品之花佛授一牛之記
康熙己未年十一月
萃藏室謹題

大方廣佛華嚴經疏論纂要卷第五十八